



何震川先生集卷之十五

信陽何洛文啓圖

記

信陽增修子贛書院記

男奕家梓

信陽之有書院蓋自正德中前兵備僉事隴州  
閻公子明始闢公既城信陽復斥城北隙地初  
建書院祝故信陽宰先賢端木子贛而因以造  
士其中名曰仕學書院信陽士自是彬彬多興  
起關中王元凱為紀其事勒之碑云嘉靖間憲

副婺源潘公希行崇獎學校不佞身備都肄之  
列於時夾池汪洋宰木翳鬱芙蓉被沼亭榭相  
望歲有果菰魚稻之饒士相與挾策講藝朝絃  
暮誦何其盛也自予去官 京師兵巡使者更  
代不一典守日益弛玩樵牧不禁白徒因而竄  
居侵盜蕪匿歲入多逋累堵連楹拉然朽崩甚  
者陂豬而田棟撤而薪千章蔽虧者童然輦入  
豪胥家矣萬曆壬辰僉憲閻中任公文庸至廉  
得其狀首寘豪胥於法周爰咨詢喟然歎曰書

院寔崇賢育才之所而頽圯若此司政教者謂  
何迺清覈隱冒歲得租若干以屬州守南宮韓  
君策大修治之而命沈判懋敬董其役工始於  
是歲冬十一月逾年夏四月告成前曰性道堂  
五楹內為重構曰美富齋貌黎公像左右翼舍  
各三楹兩翼舍後為號舍各十三楹凡夾室庖  
湏門屏周繚罔弗煥以飭門外左方臨流築臺  
臺上為君子亭而總樹棹楔曰子贛書院會春  
夏大雨掘水注陂前後皆滿移種蓮荇田田然

環植花竹森然景若增而勝地若增而靈者  
不直頓還舊觀而已公喜召予落之曰茲且拔  
士之秀者羣聚讀書俾進其學而月再課之子  
盡記示久遠無俾今日郁乎濟蹙而後尋落落  
也予曰唯唯夫書院主祀子贛而前人顧以仕  
學名者何也豈以賜也日損不若揭日益者示  
之趨耶無亦謂西河二語體用具備凡宦於斯  
習於斯者咸可顧思耶是殆不然聖道大中不  
及者跂之難而過者瀕之易即欲學聖人之全

莫近端木氏者雖然賜在二三子中稱最賢矣  
太史公因貨殖著評而載其結駟連騎聘享諸  
侯因言語列科而載其存魯亂齊破吳強晉而  
霸越此何以稱焉予謂政使有之夫子固心弗  
善也而屬厚望者恒在焉則何以故彼顛顛篤  
謹用守師說可耳必遇則傳非進取高遠弗任  
者在所裁之何如耳故與其弗如抑以不幸不  
曰夫我不暇則曰非爾所及往往深折其逢蠅銳  
之氣俾約而精思瀕而力踐研凝契悟賜也其

始庶乎晚年一貫特授舍參無兩性與天道聞  
所不聞顏曾而下庸多讓耶至其宰信陽而服  
膺聖訓迄今當官三事萬世準的焉仕學體用  
曷以尚茲予故曰願學聖人之全空莫端木氏  
若也然則公之嘉惠斯舉不獨維新規制而且  
釐正厥名詎無意與教之必因其才居之必擇  
其地引之必向其方所為陶鑄而鼓勵之者至  
殷殷矣士際斯期瞻仰感激即中材猶然思奮  
矧惟茂異繇今之學追古之道躬行為本出入

不悖所聞敬業而羣則一貫是繹得時而駕則  
三事攸矩克斯志也會謂及肩非數仞之基丘  
陵限日月之照哉脫或誦讀不論其世利達浸  
渝其初維昔賢令德成而上跡超貨殖科邁言  
語而士嚮風景行委蛇乎其中有年乃瀉仁義  
湛浮華出道德入權譎異日登性道之堂有不  
顏汗首疾掩面而卻走也者幾希何進取高遠  
為也漢詔有言守令者民之師帥多士師帥不  
遠固儼然矣而臨之矣矧明監司率厲作人良

守牧推德意而廣之詎無副此躬逢者出乎哉  
不佞文質行能罔所底止豈曰有諸已者顧詩  
不云乎心乎愛矣遐不謂矣敬記之以諭多士  
傳

京兆倅馬長公傳

馬長公蓋遠遠篤行君子也世為同州著姓大  
父通知博野繁峙二縣以賢稱父珍官宛平丞  
母曰李夫人後用仲文莊公貴四世並受一品  
封長公諱自勉字伯懋所在學者稱懋菴先生

生而頎秀端醇不事兒嬉幼從宛平公邸舍受  
書燕王生已歸同文莊公改受春秋郡雷生所  
相與切磋精進繼聞祓祊張生善春秋更負笈  
二百里外從之游業浸遠矣自髫年補博士弟  
子屢試輒高第顧數奇竟不利大比歲己未起  
家明經癸亥除訓邾庠丙寅奉宥平公諱己巳  
復除長垣司訓庚午轉吾申學正凡三振鐸為  
多士師務孳孳躬率先未嘗一厲色加諸生長  
公即溫然長者乎中顧毅然有執諸生中怠者

畢振抑者畢直急者畢佐跡弛者務警而化之  
長垣于生修贄而豐則峻卻以義申陽朱生才  
而天弗克塋則首賻以倡章縫比比誦德如一  
口謂長公諡則師也恩其親乎在三之義且兼  
兩矣治醜使者胡公首嘉重長公謂誠可孚士  
守足維風都御史栗公直指楊公踵薦於朝  
疏學正某入堪主六館出堪長列城咸實錄云  
壬申陞國子助教會上兩宮徽號覃恩勅  
進登任佐郎尋罹繼母張憂歸乙亥起守前官

丙子 上視太學 賜綺衣一襲時文莊公以  
舊學位大宗伯特受眷遇尋簡入政府長公益  
晦迹却掃泊如也朝士非習長公者不知為執  
政兄唯是循循善誘六館歸心猶之乎三庠矣  
戊寅滿三載考雅不欲就省臺選僅擢順天府  
通判未幾文莊公卒於位長公散屣一官而急  
在原即當路固留之拂衣不顧也士論嘖嘖高  
之方解京兆時吏有懷兼金乞居間者長公峻  
叱迺公不愛官爵顧愛暮夜金邪究平公老而

傳母李夫人又卒長公居子舍則代持家秉親  
安其養弟若子姓紆其勞及官四方每遇節誕  
必馳具滫瀡勅子孫代上壽祝拜感戀竟日夕  
處三弟恩禮備至視諸弟之子猶子也從兄芳  
逝而蚤為撫成其孤從子應科老而困為經紀  
其產配楊安人棄世長公甫踰耆即屏居一室  
弗畜姬侍諸子以繼室請輒曰吾素高子輿王  
駿之節且子若孫成行矣何更娶為里居擇齒  
德具者相邀結社山水林樾間值佳辰令節道

遙容與時共酣暘此外非蕭然焚香晏坐則研  
精內典耽玩玄寂而已有司春秋舉鄉飲賓首  
憲老惟長公既敦辭不獲始一涉城市耄穉聚  
觀指羨若翁翩翩固四皓九老儔與雅言生人  
大本二曰忠與孝大寶三曰慈儉不敢為天下  
先槩諸奉身以是啓迪嗣人亦以是子弟彬彬  
然僮僕恂恂然望而知其為馬氏家兒數百里  
間之絕已告者婚喪無資者危莫拯難莫排者  
溝瀆待榼瘞憒待餌者以莫不曰於我濟當歲

之入豫積麥粟索百斛比價騰踊趣令平糶以  
為常計所全活不啻衆矣猶恒歎然其未獲職  
親民庸詎藉口是亦為政何隘也嘗有味乎王  
梅溪真西山勗邑宰二詩時時諷詠用以見志  
逮季子協以鄉進士令廣宗罷而問政乃擊節  
誦之協謹受教令廣宗三年報最馳封長公階  
承德郎贈母楊安人庶幾乎於吾身親見之哉  
長公生正德己巳十二月十五日卒萬曆丙申  
十二月某日享年八十有八歲卒之日夙興呼

諸孫辨嚴若有迎之者沐浴危坐類脫而仙焉  
斯體受歸全高朗令終者非邪長公子四人曰  
慎散官曰忱吉州學正曰恬不仕先長公卒曰  
協即廣宗令子之子十有一人偕計者一曰朴  
列郡庠者六曰橋曰梧曰格曰柱曰檢曰材其  
四曰櫛曰櫓曰椿曰楷子之女九人其婿曰李  
芳曰庠生董芳曰楊櫛曰行人張養才曰庠生  
李之箕曰庠生張養和曰李居益曰李之棟一  
幼孫子之子九人列郡庠者一曰嗣燁其八曰

嗣爍曰嗣焜嗣煜曰嗣熾曰嗣燿曰嗣燮曰嗣  
焜曰嗣燦孫子之女十有二人其婿曰張曰灼  
曰董于陞餘未字蕃衍昌熾始末艾云史何子  
曰馬宗之興長公以忠厚培祚其萬石君乎文  
莊公出而棟國即關西夫子奚讓焉乃若培而  
不有以翼棟隆棟且留羨益拓培基二者蓋互  
相為用也嗟乎風之澆也士稍履顯盛率多然  
大屑越而摧剝之此宜談長公者所不道何論  
長公余既重協與朴也請獨愧貌長公不盡雖

然世豈無願執鞭忻慕焉者澆風庶有瘳乎

### 郡丞任公傳

贈郡丞柳山先生任公者諱洛字道鳴楚蒲圻  
名士也始祖傑本陝西盤屋人宋時為武昌守  
遂家江夏子澗不樂省會徙蒲圻入我 明有  
析籍嘉魚者名獻夫登曾榮榜進士蓋自武昌  
守至先生十二世矣先生生而奇穎讀書目數  
行下弱冠游黌校聲藉甚嘗結廬祖墓柳山湖  
之側博綜墳典不顯顯舉子業弟子益進稱柳

山先生同邑廖學士道南以該洽雄世特雅重  
先生訂忘年交凡所論撰多相印可曰是且張  
吾楚而鳴當世者先生顧數奇自鄉闈及選貢  
試兩畿八舉而八不售比謁選詮部銓部首拔  
之曰是何難科目而屈軼至此授廣東都司經  
歷至即欲棄官歸會蕭直指延甲蔡方伯琰重  
其才令修全廣志先生用是周知廣南要害多  
所論撰而禦黎要略尤稱石畫焉俞都閩大猷  
每征五黎輒引與計事勝美得之先生者居多

兩委驗番舶恒情率謂奇貨可居先生不一屑  
念惟見銀濤拍天巨魚山負輒欣然向海若曰  
奇觀奇觀孰與龍門氏上會稽探禹穴南浮江  
淮勝哉在任九年允署篆都司督捕廣州司番  
禺南海東莞權務已慮十數往來垂橐而已索  
諸奚囊則三洲集浮海草篇什種種富也有方  
伯譚某者待以常流為索金壺無可應語稍侵  
之先生即日理舟歸盜襲至洞庭知無所有乃  
去抵家而業不加拓行義則日增而高諸貧無

以生者死不收者負不能償者士人困悴無所  
仰給者咸孜孜周賚不少倦且天性孝友父良  
翰甫應歲薦遽遘篤疾至刲股以進立愈父卒  
柴毀孺慕奉母孫孝養倍至撫教諸弟皆有成  
立初娶於王賢而能佐其學為脫珥市書有樂  
羊子妻之風生一子文鼎為諸生早卒繼娶於  
張益用勤儉恢其家生子文觀幼慧能詩亦早  
卒次者文定今官南陽府同知以政成報家贈  
先生如其官二母皆空人云太史氏曰傳言繼  
楚有材信哉以任先生之積學砥行才可遠施  
而僅僅一官仕足自潤而苦吟恬漠謂亢厲守  
高者非與古德有云夫惟嗇是謂早服謂之重  
積德先生之積厚矣空郡丞君之起家筆筆也  
迺發不勝留任氏之祚豈其艾邪雖然不易乎  
者鄉評而月旦與之莫難致者綸縉而華衮被  
之敦史且載而傳焉蓋天之定久矣一時亨否  
利鈍曷足計哉

墓誌銘

處士西林顧先生暨二配合葬墓誌銘

西林顧先生者今進士綬父也綬既成進士矣  
迺以狀抵其同年友洛文曰嗟乎我顧氏姑蘇  
人也而先考僑寓臨清遂暨吾生妣曾迄卒於  
清嫡妣沈則卒於蘇前後越二十年所矣而三  
嬪尚以貧故各厝淺土傷哉不肖孤日夜痛心  
焉今幸仕有官矣將以是歲二月廿日舉二柩  
如蘇合葬武山祖塋之次唯吾子志且銘之而  
託諸幽余傷顧君之志手其狀反覆三嘆息云

按狀顧氏當宋南渡時自汴徙蘇之東山家焉  
遂為吳縣人勝國時六世祖曰邦三生均達均  
達生彥祥彥祥生孟庸孟庸生宗潤宗潤生彝  
彝生先生先生諱景明字鑑之生而明智果毅  
樂善喜施意豁如也始交於吳人吳人無不愛  
重賢之既迺去商於清交四方人又無不愛重  
賢之稱曰西林先生云正德中逆寺黎真者督  
鎮臨清暴威橫斂莫敢誰何偶蘇商有忤其黨  
者真怒遂並逮諸蘇人商於清者繫之獄先生

亦潛避它所繼而奮曰大丈夫當為人排難解紛矧災且切身何避為迺出訴於御史臺會能御史者按山東嚴重執法凡求理者慮其妄也則先重捶之而後受理先生迺解衣受捶竟不歿事果得白悉寘其黨於法未幾真亦以瑾事敗始交游人見先生恂恂儒者也不謂其能急人之難若此則又大敬禮先生事事來質疑決平及經先生所可否人人自以為當其意咸歡解以去每里中橋梁道路圯壞先生首出金修

之諸人則爭出金工以立就先生雖處闒閥中不以貨財屑意好飲酒縱歌暇則携游好登高臨深遇嘉樹茂林輒歡洽終日或經旬忘歸坐是贊日匱曾夫人間請先生為子孫計則掀髯笑曰吾豈效世俗守財虜邪浮生如寄吾自適吾志耳兒子輩固各有命也慷慨自若然卒以酒困病無何卒是為嘉靖十六年十二月五日距其生成化二年十二月十四日享年六十三配沈氏蘇世族也生成化五年三月一日卒嘉

清二十五年八月二日年六十一生三子一女  
子曰縉娶某氏曰絲娶某氏曰紱娶某氏女曰  
蕙英適吳霑側室曾氏其先廬陵人而商於清  
因家焉以成化十年二月十二日生曾氏嘉靖  
十七年六月五日卒年五十八生子一即進士  
君也孫男四曰松娶汪氏曰梅曰植曰杏皆幼  
曾孫男一曰七十曾孫女一曰金許聘梁墳子  
何子曰余觀西林先生志行磊磊有古烈士風  
至其酣酒不治資產又類達生者迺綬則泣謂

余曰自先考商於清沈妣與曾蓋終身未面也  
而異地相得無間言沈妣產三男甫成童即遣  
之清依曾妣曾視三男若已出撫摩鞠育備至  
及送之親迎於南壑所有以給婚具先考十餘  
年不歸也沈知其以商故無所嗾於曾曾雖日  
侍先考於清顧時時念沈不置歲中間遺不絕  
嗚呼賢哉二配是可以觀先生矣銘曰虎丘回  
瞰崇者岡珠耀於充吳則藏南有樛木葛藟荒  
鳳兮厝此從兩凰玄臺有賁遲龍章我銘爾兆

終允臧

何震川先生集卷之十五

何震川先生集卷之十六

信陽何洛文啓圖著

墓誌銘

男奕家校梓

封奉訓大夫宗人府儀賓月林楊公墓誌

銘

書有之貴不期驕祿不期侈言振拔者難也世  
有享華襲盛而約已嗜修君子與之矣矧義方  
善積耀前啓後彬彬望乎四方非所深嘉而樂  
道者耶史何子曰予乃今徵之月林楊先生云

先生諱西山字華甫上世江西鄱陽人代業儒  
醫傳至諱琰者有名天順間起官太醫院終  
周府良醫正其事行具大學士瓊山丘公所為  
志中子孫蓋自是家祥符矣良醫公子諱濟濟  
子諱榮並以醫世其官榮娶於王生四子長曰  
北山仲曰東山饒陽縣知縣季曰中山而先生  
其叔子也先生夙穎為父所奇稍長漸露頭角  
向學有聞矣比弱冠伯兄與父繼逝家稍落會  
汝陽王七輔國將軍為其女餘姚縣君選婚必

欲得先生請於朝以先生為儀賓階奉訓  
夫先生雖貴為宗親而緝學敦行動必於儒者  
慟父不逮養奉母甚篤旦夕必甘瀟其親而躬  
含蔬茹淡意訢訢焉積十餘年如一日也己而  
仲兄尹饒陽固迎養母母既就養尋卒官邸先  
生則痛毀始絕自後言輒淚簌簌下蓋終其身  
哀慕不替云生平敬事二兄撫成一弟二妹尤  
力至罄縣君奩資婚嫁焉先生有子四人縣君  
出者曰時譽時寧時馨副張出者曰時雍並秀

雅不凡先生督教備至嘗訓之曰吾少有志當  
世竟格於例已矣居恒自愧荷 國恩縻卹祿  
尺寸無由效也若等其毋忘酬吾志矣出則令  
親明師益友考志問業入則父子兄弟家庭間  
切磋究之用是諸子學並有成翩翩起時譽舉  
嘉靖甲子鄉試時寧登隆慶戊辰進士歷官吏  
部考功司主事時馨與其從弟四知偕登萬曆  
甲戌進士楊氏家世遂藉藉聞四方咸謂先生  
身雖弗試而三子奉其學顯津津未涯其季又

將以文學進諺曰藝穀者穫藝木者蕃先生之  
所藝厚矣楊氏其可量哉先生雖燁然綦盛乎  
然謙約性成終始不易與人無少長貴賤咸接  
以禮待宗族尤有恩婚喪不能舉者周卹之有  
過及與人競者開諭之貸未嘗不與與未嘗責  
償也諸子既次第成名先生則謂之曰高山有  
基大海有源若先人世有隱德深長矣吾與若  
母勉葺之乃發於汝等夫聲名利祿易致耳惟  
廉惟慎可以持身肆成之艱墮之匪艱念之哉

生平足跡不入公府間出乘一巾車蒼頭御之見者不知其先生也諸縉紳過考功諸君者求見先生先生輒辭謝之日惟課農桑種竹灌園自娛無事則焚香宴坐親友至則談笑命觴口不談世事人謂有萬石君之風焉先生素彊盛無疾偶患咽痛進涼劑轉加脾病病既革諸子偕侍惟諄諄勉以忠孝大節語不及它卒之期萬曆甲戌五月二十有一日也距生弘治壬戌十二月二十三日享年七十有四時譽娶黃氏

時寧娶高氏繼袁氏贈封俱安人時馨娶陸氏時雍聘李舉人潛女女子三人孫男子二長王謨聘和舉人震女次王猷幼孫女子四人諸子將以卒之年閏十二月十五日塋先生於城南祖塋之原而持同年友王客部用章狀來徵銘於予予亦先生年家子也固宜銘矧其行履曷然又君子所深嘉而樂道者耶狀蓋曰是有道之碑也嗚呼其信然哉銘曰有其培之引胡厚也伊其豐之修胡楸也俾爾熾昌宜斯佑也君

子之藏澤莫可究也

封奉政大夫工部營繕司郎中恬巖吳公

墓誌銘

按晉督學薛子道行氏狀吳公諱邦寧字仲本韓城之土門里人也世以孝弟力田稱至祖棟始稍有積箸好施予生處士公廂當處士公時業更中落家或不克贍矣而世好行其德配王氏寔生公公體氣高亮音吐和雅少讀書已而罷去處士公曰吾家世無顯者而稍稍用儒術

聞始基之矣修而業而益大其在而後人乎及公娶王安人生子即敘州守從周少而警異公乃更前白處士曰是兒也庶可以竟大人志也者而公益務敦禮讓躬儉勤為子姓先且賓延儒碩益課責敘州業日至已而舉鄉貢三上禮部試不勝公所以督之一切如諸生敘州遂成進士授工部營繕主事課最得封公如其官公雖稱貴人乎然益務折節為恭謹寔行燕中視繕部郎從一童子蹇後襪被而已不知其郎父

也徐伺得郎任職毋害狀始巖然曰孺子任為  
郎矣毋苦閉廼公邸舍中為而自公歸里則蔣  
花竹疏泉壘石日召所善客飲曰毋詫我貴人  
我故怙巖生也蓋公往往自稱別號云迨敘州  
既婁遷其部郎中而會 上大婚禮成用 覃  
恩得加封公奉政大夫予之誥如繕郎里人豔  
之公日益召故所飲客飲曰毋用大夫貴我我  
故繕部主事父也公雖健少疾而敘州念欲奉  
公朝夕甚竟以久次得出守敘州公聞之喜顧

仲子而兄不難繕部郎毋用廼公視太守任職  
狀矣俄感痰疾尚與家人言笑吃吃不止無何  
遂卒卒之辰乃敘州去都下日也嗟乎公忍令  
敘州不逮於遺令乎廼先於仲子令之以郎繕  
部者往可已時萬曆八年二月二十五日距生  
正德九年十月十三日享年六十有七男子二  
人長為從周娶劉氏次從明娶師氏一女適某  
孫男一曰光裕娶賈氏為知州緣女孫女五許  
字俱名族道行又言公敦朴寡言居平若昏昏

而中甚辨替即不可意者斥不少貸以故人始  
或疑憚之稍益安之矣蓋薛子核於文辭不妄  
許與又為公里人兩家世相善而敘州之才而  
賢為之前者可信也余習知敘州諡弗克辭誌  
而銘之曰於戲大夫匪德爾餘而慶是都匪嗣  
爾孚而謨是訐猗鳳山之穹如依先域之葱如  
是為有吳君子之幽墟於戲

封通議大夫通政使司通政使李公暨元  
配贈淑人孔氏合塋墓誌銘

封通政使李公既卒之明年某月某日其孤通  
政使際春進士茂春卜塋公城東北某地之原  
啓其母贈淑人孔氏之兆合焉禮也乃屬同邑  
某官黃君為狀寓書於余願得一言先諸隧余  
從鄉大夫後與聞公質行蓋與狀符云狀曰李  
之先臨賴人也有諱遵實者元末避亂於杞遂  
為杞人遵實生榮榮生英英生祥即公曾大父  
也郊居值大雪有椒商馬逸遺千金道左翁坐  
待其至完歸之竟不啓視人謂翁為德至厚後

世必有興者生子美美生贈通政公岳配某氏  
有丈夫子二公某仲也公生而穎卓既成童不  
喜嬉弄長益疑重喜讀書多所該洽業幾成而  
贈通政公病矣公與孔淑人視湯藥唯謹且籲  
天願以身代而贈通政公病益甚執公手訣曰  
吾家世農而儒又而曾大父有隱德是不發於  
而必於而子孫矣吾瞑可也遂卒公哀毀若孺  
慕既終喪修其故業益力冀成父志試補博士  
弟子員隣邑考城有富室延公受經時有少婦

寡而豔亦僦居館舍傷主人即令執公爨蓋與  
之居者二年而公目不一瞬其端方如此歸而  
業益大進就督學試即無先公者俄丁母贈淑  
人艱及禫已踰督學試期屬御史收兩河逸才  
公就試亦無先公者而督學者謂御史侵其官  
將釋憾於士及期繫公他所竟不獲試公喟然  
曰吾命有所制矣遂棄其業下帷教授里中諸  
生常數十輩時通政君方就塾敏而嗜學公摩  
其頂顧孔淑人曰豈有生兒如此而長貧賤者

乎乃日夜以故所學刮勵之而孔淑人為拮据  
有亡佐膏晷費亡何通政君補諸生高等又十  
年舉於鄉連舉進士尋釋褐行人時琉球中山  
王來請封通政君以選為奉冊使副給事中  
某以往公遺書教之事不避難臣之義也且奚  
必嶺海外能成人哉孺子勉矣於是通政君慨  
然行歷四載乃還天官最其勞天子為詔超  
丞尚寶而公以前官移封行人隆慶改元通政  
君時為南京太僕少卿而公亦得以覃恩加

封中憲大夫如其官贈母孔氏為恭人俄改太  
僕少卿歷卿鴻臚太常至今官夙夜匪懈克當  
上意而一時風采弁冕諸卿皆斤斤無數公  
之教也隆慶壬申今上登極覃恩公又得加  
封為今官贈恭人為淑人公父亦以例得追贈  
如公官母贈如孔淑人萬曆甲戌通政君念公  
春秋高乃引疾乞歸公於是委家政焉而一意  
以教其仲子迨己卯仲子果舉於鄉庚辰又進  
舉進士蓋進士君偕計時公尚強飯亡何而病

脾且日益癯仲子南宮捷至通政若流涕被面  
蹠而啓公公頷之而已越五日遂不起公天性  
淳朴悖讓守約不異布素又善與人交無論貴  
勢人即廝賤卑少見之者煦煦如飲醇焉鄉人  
有事必質於公公慨然為指曲直無不滿意去  
兄古肥君孝弟力田公事之甚恭自幼貧及老  
而貴顯無所間其子四人公視如己子俾各有  
成學宮門舊庠隘又久雨而圯公捐百餘金葺  
而新之祀舊有史烈女久無祠公言邑侯創祠

之春秋祀焉嘗於舊墅蒔花竹名其堂曰恩樂  
自作記始千言大抵志不忘君也晚治延道  
館於所居之南與友人觴咏其中以為常祀人  
稱好行其德享有諸福者必曰川南李公云而  
孔淑人者為祀義官孔恩女勤儉孝慈與公儷  
德幼有姆教諳女誡諸書自通政君五六歲時  
即課之業不少姑息卒以學顯淑人蒙養之訓  
居多也公諱東魯字鍾秀生於弘治甲子孔淑  
人生於正德己巳而淑人先公卒四十年是為

嘉靖辛丑二月三日享年三十有三公卒以萬曆庚辰三月六日享年七十有七公繼配邊氏子男二人長即際春孔淑人出娶張氏贈淑人繼劉氏余氏封淑人次即茂春娶劉氏繼盛氏女一人適杞庠生陳宜命俱邊氏出孫男六人女五人婚聘俱名族曾孫男一尚幼銘曰盛德之後必百世祀疇歸之金而食報於孫子繫維公作求以繩厥祖而昌厥嗣宮於是媿於是永安爾藏延後祉

天理呂翁墓誌銘

嗟夫至哉天之為理乎天地有時而易日月有時而磨人類有時而漸盡而此理者固惺然常在入之心也何子曰寧陵蓋有天理翁云翁名某字某平生以天自信以為人之生若肌骨毛髮人之性若喜怒哀愛欲人之動若卧起拜趨俯仰人之遇若富貴貧賤死生人之倫若父母妻子昆弟長上友朋人之胞與若鰥寡孤獨顛連乞丐若雞豚狗彘草木蟲魚皆天也而理者無

不在焉吾謹持之耳翁幼孤不逮事父以是常不欲諸子事已曰此吾終天恨也宗人多貧公嘗欲倣范文正公為義田贍其婚喪曰吾以篤天親也性喜道人善然亦不曲庇人過往往面規之天道善善而惡惡不敢蔽也丐者至門疾呼家人給食或推其食手予之天道好施不敢靳也有蝎毒翁第令舍之竟不撲殺大雪饑烏徧野為掃地布食就食者數千或集翁膝依依不去天道好生不敢殺也子坤鄉捷至里人喜

動翁自若翁齒輩尊當歲時飲讌雖卑少必以禮下之天道好謙不敢盈也齋醮祈禱一無所崇天道禁邪不敢即也喜讀史及古樂府詩餘諸書不求甚解間為吟咏亦不求甚工曰吾以適天趣也翁病亟呼三子前曰吾無物遺汝等遺汝等兩字寶之哉日栽日培胡患弗恢日消日磨胡恃其多言已卒全天而歸之也俗言天理者主因果其事淺儒者之言之也主存省其旨微嗟夫翁於天理之際深矣翁之先洛陽人

呂姓國初諱成者有功 王師 高皇帝璽書  
復其家紙尾誤呂為李歷覺明景惠及翁五世  
不敢更萬曆丁丑子坤始請復為呂云翁娶王  
氏繼李氏生子乾宗人府學錄坤舉甲戌進士  
吏部考功主事巽庠生女懷貞王出適萊蕪令  
曾天福懷潔適殷可立懷淑適睢陽衛鎮撫李  
季孫七知初鳴琴乾子鳴雲鳴臯坤子鳴岐鳴  
謙巽子女孫二翁以某年月日生以某年月日  
卒以某年月日塋越十年戊寅贈今官又三年

辛巳余始為銘銘曰吁嗟翁兮天理萃厥躬兮  
翁有子兮天理貽之社兮天不昧兮理不二兮  
翁永以為謚兮

兵部右侍郎進都察院右都御史十山談

公墓誌銘

隆慶戊辰正月十六日都察院右都御史十山  
談公卒於家訃聞 上賜祭塋皆如制其子志  
伊卜歲某月某日塋公某地而奉左布政使秦  
君梁狀謁予乞銘於乎古所云戮力王室紀綱

四方者公蓋其人與而今已矣惜哉公諱愷字  
守教上世汴人扈宋南渡徙無錫至壽齋公某  
而族始盛又五世生詔贈南京湖廣道監察御  
史公高祖也曾祖諱復封南京刑部郎中祖諱  
綱仕至萊州知府考諱一鳳仕至平江知縣後  
以公貴兩世俱贈兵部右侍郎兼都察院右僉  
都御史云公生有異徵甫釋襁厥考攜過夏口  
墮江漂五里竟不沒而坐於沙渚觀者神之幼  
即奇警弱冠有俊譽舉嘉靖乙酉鄉試登丙戌

進士授江西司主事奉 詔使閩還值考君病  
風痺公日侍醫藥供養甚篤繼執二親喪致哀  
盡禮比服闋如京無以為裝鬻田乃行復除浙  
江司主事權稅河西通商抑豪及建白利漕四  
事聲大起轉四川司員外郎巡通州倉有外戚  
漁利者請增造船於通惠河公疏爭增船五不  
便乃止尋復監兌江西督漕儀真並展嘉畫已  
進江西司郎中歷守度支先後官大司農者咸  
倚重焉八年而出為山東按察副使適王少司

馬檄開馬場湖歲方大侵同官多役丁夫民苦  
之公獨無所役且念可因以寓賑乃懸榜慮備  
發帑授直三日而應役者三千三旬有二日而  
工畢王喜甚首上其績妖民趙雲假符印惑衆  
取財邏者欲株及邀賞公廉其妄止當雲罪餘  
悉宥之癸卯山東鄉試御史葉某以監試屬公  
會御史以試錄故譴歿詔獄公亦坐貶信宜  
縣典史尋量移懷慶府推官台州府同知久沉  
下僚意泊如也五遷乃復為四川按察副使蜀

方有盜警諸平民被誣引者多竄伏且及於亂  
公至立釋之令復故業羣黨解散逾年擢山東  
右參政轉按察使晉福建廣東左右布政使所  
在職舉乃簡擢都察院右副都御史巡撫南  
贛汀漳時贛賊李文彪海寇徐碧溪等騷浙  
楚閩廣間濱海城邑多陷沒者公乃開布誠信  
招降文彪而疏上機宜六事以制碧溪未幾碧  
溪復寇潮公受策海道汪副使率兩指揮邀擊  
之會颶作我師乘之碧溪溺歿俘斬無算虔州

以寧捷上有白金文綺之賜旋進公兵部右侍郎兼右僉都御史移鎮兩廣兩廣山箐險密蠻寇盤據已久明年突發嶺西聯絡新會溪洞四出焚掠殺千戶黎元公畫策分兵進剿一鼓而殲其渠率捕斬五千五百有奇是役也兵僅三萬時甫四旬而蕩平諸巢略定五縣衆方擬諸藤峽之捷顧內有嗾公者言者受指抑之故敘功僅得廕一子餘陞賞有差時論惜焉公在軍日夕念母王太淑人髮毵毵白時方剿大

山賊將就俘矣乃懇乞致仕得請即行後總督王某追疏公績云大羅山賊阻險肆毒積久難制間者師出四月薙獮靡遺匪臣實能皆前總督談某籌略預定故臣得乘機致勝乞首錄以勸詔進公右都御史致仕公性孝守潔抗爽敏練以久官戶部故版圖錢穀之數纒纒如指諸掌尤曉暢兵事臨敵遣將親授成算羽書露布悉自手出雖矢石如雨而意氣安閒故所在克捷云自致政歸築園九龍山麓多積圖書其

中日召故所與游者置酒賦詩其曠達文雅鄉  
人咸起敬焉所著有虔臺續志五卷平粵錄三  
卷奏議文集若干卷距生弘治癸亥十二月五  
日享年六十有六嫡母吳生母王贈封俱太淑  
人元配朱繼配屠贈封俱淑人屠淑人先公數  
月卒生男子一人即志伊以廕入太學授太常  
寺典簿女子二長朱出適庠生華世仁次屠出  
適秦布政子庠生燮孫男子二長如金聘刑部  
主事華某女次如玉孫女子一俱幼銘曰北洵

奇兮生則傑乃奮興兮樹烈烈筦邦計兮紆石  
畫蹶而起兮善藩臬聿開府兮方召埒壯厥猷  
兮炎氛斥功方崇兮志已決有未酬兮延世澤  
我勒銘兮納玄宅萬斯年兮冢截嶠

贈文林郎浙江道監察御史素菴房公暨

配封太孺人盧氏墓誌銘

國初汝陽故家蓋七姓云七姓中趙有吏部尚  
書公好德房有工部侍郎公安並以功德顯名  
當世故二姓尤著房之先元末有諱能者寔生

二子曰志堅伯堅志堅即侍郎公父而伯堅則房公高祖也有子曰隱君完完有子曰隱君琮琮子宮蚤負俊才有聲鄉校顧絜舉不第棄去為名醫鄉人稱曰儒醫先生儒醫先生配張氏子三人長文實次文光幼諱文璇者公也字德衡生而偉幹疑重見者奇其不羣九歲失父依兄伯伯不事生產家漸貧困矣公遂罷舉子業力貿易共母而事兄友愛甚篤未嘗校有亡為人重義氣視財利泊如也一日入酒肆見遺金

一囊坐而至暮待遺者來而歸金人以此稱長者居族里間退讓敦信雖少賤處之如一生平未嘗與物有競故族里間亡賢不肖咸敬慕之鍾愛二子終身亡譙詈語然義方之誨諄諄朝夕曰吾少貧困廢學至今為恨若輩必成我志我貧且樂故長君起家進士官御史次君相繼薦於鄉功名皆未有艾焉今汝南人轉相語曰公侯之後必復其始曷觀房公修德守約不旋踵訓成二子振起先世烈烈也公性不喜華麗

蔬食布衣充然自樂及二子先後顯名間進綺  
縠為公壽不御嘗自謂素菴居士以見志里人  
因共稱曰素菴先生云始公幼也嶧縣令同郡  
盧翁盤有賢女不欲輕字人獨器異公許焉是  
為太孺人太孺人歸公敬恭治內攻辛茹淡不  
自知為宦家女人謂有孟德耀桓少君之風後  
家漸起子貴有封矣猶服勤儉不易其初又若  
不自知其為太孺人者斯可不謂賢哉乃其尤  
足稱傳者御閨門肅肅如也訓二子斤斤如也

嘗命之擇友而處友賢者也必具茗饌食飲之  
友不賢者也亦遠遠不敢以交二子二子每事  
必請太孺人可不可惟命方長君為承天推官  
將行公固以明慎哀矜諭之已太孺人就養承  
天聞用刑輒不樂推官退而具言其狀太孺人  
曰固也獄情亦隱矣慎無任怒當人罪後推官  
用廉能徵拜為御史太孺人尤惓惓勗以毋忘  
乃父之訓御史固好修而奉教又謹故自推官  
任臺察出按燕秦所至公正平恕天下仰其風

裁有自哉有自哉往歲今 上登極覃恩臣下

詔贈公文林郎浙江道監察御史而太孺人亦有今封公生成化己亥九月二十一日卒嘉靖壬戌四月一日壽六十一太孺人少公一歲以四月十五日生隆慶庚午七月十六日卒壽七十子二長楠即御史先娶李氏繼傅氏贈封皆孺人次桂舉人先娶朱氏繼劉氏女一適郡庠生孔惟中孫女三人一楠出壻曰諸生孔明夔後太孺人四月卒餘幼顧公及太孺人卒也

御史始官承天繼官京師弗獲視含斂而後先奉終惟弟桂在故御史尤哀毀擗絕見者惻然傷焉已共卜吉兆於穆家河先塋之左將以是年冬十二月二十七日啓公柩與太孺人合塋新阡乃走使持叅政趙君賢狀來屬某銘某於御史年家子也知厥家世為詳而叅政君以孝廉為今循吏第一其言尤當實不誣云故采而志之銘曰嗚呼允哉齊德而嗣並傑垂瓠之原有丘截截萬年是宅行也揭揭

何震川先生集卷之十六

